

狄道州志卷之五


祠祀

狄道州志

卷五

學宮圖

學宮圖



狄道州志

卷五

學宮圖

二



文廟 在州治東卽舊府學宮也本元司徒祁安所建明洪武時教授劉杰重修之繼而修者天順時有知縣管見萬歷時有同知唐懋德天啟時有知府藍近任

國朝順治時有推官岳峻極康熙二十二年有知府高錫爵俱增修之五十七年知府楊宗仁復修大成殿緒添前簷五楹雍正六年總督岳鍾琪征西過謁捐修兩廡及鄉賢名宦等祠乾隆三年知府宋安仁率紳衿修泮池乾隆十六年知府閻介年知州程鵬遠各出俸率紳衿捐助重修 舊縣文廟在州判署西明洪武五年建崇正己卯知縣褚泰珍重修康熙庚辰知縣婁玠復修乾隆四年改府移州學於舊府學縣

學廡乾隆九年改爲洮陽書院今爲倉

崇聖祠 在學宮內東北

文昌奎星閣 舊在學宮之西明萬歷時郡守王日然建乾隆十六

年重建學宮生員張鵬岳葵黃鏞等移櫺星門左右

名宦祠 在學宮戟門左

鄉賢祠 在學宮戟門右

忠孝祠 在名宦祠前

節義祠 在學宮西

道統祠 在超然書院東北明典史楊繼盛建

文昌閣 在岳麓山有祭田一頃

狄道州志

卷五

祠祀

三

奎星閣 在岳麓山南有祭田一頃

社稷壇 在州北關

風雲雷雨山川壇 在州城南

先農壇 在州城東

城隍廟 在州治北卽舊府隍廟 縣城隍廟舊在州治城北

之結河溝康熙庚寅始遷於城內州治之東壬午歲知縣婁

玠重修雍正十年知縣劉鶴鳴移建於州治南規模宏敞遠

愈舊制改州後廟祀廢乾隆五年知州張儒改爲關帝廟

關帝廟 一在州治南乾隆五年知州張儒改縣隍廟爲之每

年致祭於此 一在州西門內康熙二十四年驛鹽道郭景

昌重建乾隆二十三年郡人客商改建 一在北城門內明
初建萬歷丁亥知府賀愈重建 一在遊擊署東 一在南
城圍內 一在東山洪武三十一年建教授吳圭有碑
旗纛廟 在州治左舊在城西乾隆四年知州張儒遊擊張英
偕紳衿移建遊擊署之南數步

馬王廟 在州治左舊在城西馬闌乾隆十年遊擊張英把總
李時華偕州人移於此

厲壇 在州北關外通志作北關內悞

八蜡廟 在州城南二里

河神廟 在州城西二里

狄道州志

卷五

祠祀

四

火神廟 在州南城門內

雷神廟 在州治南

金龍廟 在城北二里

藥王廟 在州治西南康熙九年義士張經綸建

東岳廟 在東山宋元豐八年奉勅建

二郎廟 在城東二十里

三聖廟 在城南三十五里

漢驃騎將軍霍去病祠 在州北六十里鳳臺山麓

左將軍辛慶忌祠 在舊縣文廟後今廢

唐文貞公魏徵祠 在州治西安積寺前洪武初其嫡裔有令

狄者建祠祀焉

宋知夔州府事梁煥祠 在城東南隅

金總管陀滿胡土門祠 在城內今廢

元大司徒祁安祠 在州西南十里祁家衙

明忠愍公楊公祠 舊在州西城外後因洮水浸城知縣婁玠

移像於東山超然臺後知府楊宗仁重修之雍正十一年奉

文估修春秋致祭於此乾隆二十二年知州松德捐買學田

分其租之半以供祠費今吏目王洙於祠旁種楊柳百餘株

一在城內州治東雍正四年知府李如璐建乾隆二十七

年華國添建書院

狄道州志

卷五 祠記

五

雙忠祠 在超然臺北順治九年御史姜圖南建祀明給諫張

萬紀中丞鄒應龍

文簡公何賢祠 在州治西十字街今廢

員外許允德祠 在州治南報恩寺前

少卿劉杰祠 在州治南北極觀西今廢

指揮晏雲祠 在州東南隅今廢

貞靜順妃張氏祠 在州南萬壽觀右

會川伯趙安祠 在州治西南

縣令李昂祠 在州治北李家院

御史曹英祠 在州治北曹家院

僉事劉朝麒祠 在州治北劉家巷

御史雍焯祠 在州治北雍家巷

給事張萬紀祠 在州治北大街東

報德祠 在州治東祀明同知唐懋德本朝知府許聖朝高錫

爵包太隆祖業宏楊宗仁後洮人添祀知府李如璐知州松

德乾隆壬午華國以祠近市移建於忠愍祠大門內

驃騎將軍石崇德祠 在州治東石家閣今廢

文廟木主定式 按志例事涉 國典海內 共有者不書但地處偏僻典文未備習焉不察率至茫然今錄以備考

大殿正位 木主高二尺三寸七分闊四寸厚一寸座高四寸長七寸厚三寸朱地金書

至聖先師孔子

狄道州志

卷五

祠祀 文廟

六

四配 木主高一尺五寸闊三寸二分厚五分座高四寸長六寸厚二寸八分

復聖顏子

宗聖曾子

述聖子思子

亞聖孟子

東西哲位 木主高一尺四寸闊二寸六分厚五分座高二寸六分長四寸厚二寸

閔子騫

冉子雍

端木子賜

仲子由

卜子商

有子若

冉子耕

宰子予

冉子求

言子偃

顓孫子師

朱子熹

東廡先賢 木主式同哲位

遽瑗

澹臺滅明

原憲

南宮适

商瞿

漆雕開

司馬晁

巫馬施

顏辛

曹卹

公孫龍

秦商

顏高

穰駟赤

石作蜀

公夏首

后虔

奚容蒧

顏祖

句井疆

秦祖

縣成

公祖句茲

燕伋

樂欬

狄黑

孔忠

公西蒧

顏之僕

施之常

牧皮

申棖

左丘明

秦冉

公都子

公孫丑

張載

程頤

西廡先賢

木主同前

宓不齊

公冶長

公皙哀

高柴

狄道州志

卷五

祠祀 文廟

七

樊須

公西赤

梁鱣

冉孺

林放

伯虔

冉季

漆雕徒父

漆雕哆

商澤

任不齊

公良孺

公肩定

鄒單

罕父黑

榮旂

左人郢

鄭國

原亢

廉潔

叔仲會

公西輿如

邾巽

陳亢

琴張

步叔乘

秦非

顏噲

顏何

縣亶

樂正克

萬章

周敦頤

程顥

邵雍

東廡先儒

木主式高一尺三寸四分濶二寸三分厚四分座高二寸三分長四寸厚二寸

公羊高 孔安國 毛萇 高堂生

鄭康成 諸葛亮 王通 司馬光

歐陽修 胡安國 尹焞 呂祖謙

蔡沈 陸九淵 陳淳 魏了翁

王栢 許衡 吳澄 王守仁

許謙 薛瑄 羅欽順 陸隴其

西廡先儒 木主 同前

穀梁赤 伏勝 后蒼 董仲舒

杜子春 范甯 韓愈 范仲淹

胡瑗 楊時 羅從彥 李侗

狄道州志 卷五 祠祀 文廟 八

張栻 萬幹 真德秀 何基

趙復 金履祥 陳澧 陳獻章

胡居仁 蔡清

崇聖祠正位 木主式 同大殿

肇聖王木金父公 正位中

裕聖王祈父公 正位中左

詒聖王防叔公 正位中右

昌聖王伯夏公 正位中左之左

啟聖王叔梁公 正位中右之右

東西配 木主 如大 殿四配

顏路

曾點

孔鯉

孟孫氏

東西廡

木主如大殿東西哲未建東西廡列主位亦如大殿東西哲位

周輔成

程珦

張迪

朱松

蔡元定

文廟祭器

帛篚二十個以木代竹

銅爵一百四十七隻

銅白磁爵三十九隻

銅燈一座

銅罇三個 銅十八件

簋一百六十四件

簋一百六十四件

籩五百八十六件

豆五百八十六件

牲俎案二十張

狄道州志

卷五

祭器 樂器

九

樂器

麾幡二竿

琴八桐質

琴案八

瑟二桐質

搏拊二

祝一

敔一

龍笛二

鳳簫一

洞簫一

笙四

箎一

塤二土質

鐘磬簨業二

銅鐘十六

玉磬十六以鐵代

應鼓一架

舞器

節二

羽十六

籥十六

千十六

戚十六鐵質

戚杆十六木質

以上等器乾隆二三年奉

文製造知府宋安仁知縣郭士全署縣劉鶴鳴訓導張蒞晉先捐造祭器後監造舞器俱太學生王克允經理

樂器告成文

明張

振

臨洮知府

維王後天地而生知天地之始先天地而後知天地之終不位而尊為帝王治教之師不爵而榮為生民立命之主固宜以天

狄道州志

卷五

舞器 祝文

十

子之禮樂享春秋之祭祀茲者洮陽郡庠音樂不聞多歷年所不惟失人心仰德報功之私抑且負朝廷崇儒重道之典振等忝守是郡良用惕然敬依古法製造樂器其樂章歌詠一遵今律雖不能召和而來百獸亦庶幾成章而備八音茲遇仲春適將明薦禮文雖舊樂奏維新先期釋菜敢昭告於聖王伏惟鑒之謹告

乾隆九年新頒丁祭祝文

惟

先師德隆千聖道冠百王揭日月以常行自生民所未有屬文教昌明之會正禮和樂節之時辟雍鐘鼓感格薦於馨香

泮水膠庠益致嚴於籩豆茲當仲秋祇率彝章肅展微忱
聿將祀典

乾隆八年新頒樂章

春季 夾鐘為宮倍應鐘起調

迎神 咸平之章

大哉孔子先覺先知與天地參萬世之師祥徵麟緩韻答金絲
日月既揭乾坤清夷

初獻 甯平之章

予懷明德玉振金聲生民未有展也大成俎豆千古春秋上丁
清酒既載其香始升

狄道州志

卷五

祝文 樂章

十一

亞獻 安平之章

式禮莫愆升堂再獻響協鼓鏞誠孚龔馭肅肅雍雍維譽髦斯彥
禮陶樂淑相觀而善

終獻 景平之章

自古在昔先民有作皮弁祭菜於論思樂惟天牖民惟聖時若
彝倫攸敘至今木鐸

徹饌 咸平之章

先師有言祭則受福四海贊宮疇敢不肅禮成告徹毋疏毋瀆
樂所自生中原有菽

送神 咸平之章 望瘞登奏送神章

鳧繹我我洙泗洋洋景行行止流澤無疆聿昭祀事祀事孔明
化我蒸民育我膠庠

秋季

南呂爲宮

仲呂起調

迎神

咸平之章

大哉孔子先覺先知與天地參萬世之師祥徵麟綬韻答金絲
日月既揭乾坤清夷

初獻

甯平之章

予懷明德玉振金聲生民未有展也大成俎豆千古春秋上丁
清酒既載其香始升

亞獻

安平之章

狄道州志

卷五

樂章

十二

式禮莫愆升堂再獻響協鼓鏞誠孚疊獻肅肅雍雍譽髦斯彥
禮陶樂淑相觀而善

終獻

景平之章

自古在昔先民有作皮弁祭菜於論思樂惟天牖民惟聖時若
夔倫攸敘至今木鐸

徹饌

咸平之章

先師有言祭則受福四海巽宮疇敢不肅禮成告徹毋疏毋瀆
樂所自生中原有菽

送神

咸平之章

望瘞登奏送神章

鳧繹我我洙泗洋洋景行行止流澤無疆聿昭祀事祀事孔明

化我蒸民育我膠庠

大成至聖文宣王廟碑

元失名

祀與戎皆國大政而祀先於戎况文廟者教化之源其禮尤勝於社稷百神也中大夫同知鞏昌等處都總帥府事祁公臨洮大家也自祖及父皆以征蜀之功世守此邑文治寔興而府學不修是用歆然適以家貲作新祠宇爲孔子及四配十哲之像七十子與古明儒皆圖於兩廡之下凡爲屋若干用中統鈔七萬餘貫又給田廬以贍其學徒荒徼之外弓馬之民漸染美俗承風而化因拔其俊良教而育之夫爲治以風教爲本公以將帥之家崇尚斯文綽然古君子之風用刻之石以俟後人

狄道州志

卷五

祠祀

十三

臨洮府重修學宮記

明潘光祖

郡人
郎中

山東藍夫子以天啟甲子來守臨洮越二載政成惠覃仰瞻聖廟攷先賢之世次闕者補之紊者序之凡俎豆樂器之屬咸加增飾復於禮殿之臺泮池之圍環以雕闌煥乎其改觀也乃矐念學宮傾圯毅然以鼎新爲己任自丙寅歲仲春始事迄仲夏而厥役告成焉先是明倫堂舊制五楹日久頽敗一旦更新視舊制尤覺巋然至於兩齋以及門墻皆因而式廓之此皆藍夫子捐俸預爲儲材而士庶踴躍趨赴以成偉績也所望者諸士澡心浴德從彝倫中體認至理從經史中做出事業庶不負夫子作新之雅意乎夫子諱近任字仁舉山東文獻世家萬歷已

未進士是役也勳其成者郡丞董公之表司理王公朝麟狄道縣大尹李君一爵署狄道渭源大尹王君淑曾至青衿之樂輸及民間好義者例得題名焉

重修文廟學宮碑記

國朝張晉郡人進士

崇德故有廟重教故有學德教不可一日忘學廟不可一日忽不可一日忽則必如父之寢門不廢晨昏必如王之闕下不廢書笏如是則日脩月飾猶虞或疏而乃聽其榛蕪者何哉學不求其本治不敦乎原以重地而任其攸斃則又從而文其說曰時不及爲也財不及用也人不及役也噫嘻是猶之乎必待豐年而脩甘旨必需高爵而生靖共也理也乎哉我岳老師舉大

狄道州志

卷五

祠祀

十四

與於人不能舉之日成大功於人不能成之時非獨私於洮也學得其本而治得其原誠見德教之不可忘而因以行其志也所謂孔門之忠臣孝子非歟夫忠爲臣職孝爲子常忠孝固不欲人傳而今日廟學之修則所謂顛沛而忠流離而孝者可不傳哉予乃昌言而告師士曰廟雖所以肅觀瞻而尤所以生誠敬學雖所以育科第而尤所以養聖賢從本原而求之夫亦可以思德教之所在矣師士念之哉師不可以多事而廢厥修士可以多事而廢厥學乎今而後洮人士多顯達而報師不如多賢良而可以報師也此固師崇德重教之心也師與前守程公合修學廟已載特記茲記其師之捐俸續成獨爲興復者云

移椒山先生遺像於東山書院序

錄節

婁玠

洮人戴先生之德立像於西門外奉祀已久余於庚午冬奉命守茲土見其祠瀕於洮河漸將崩圯遂請遺像奉於先生所建之書院東山爽氣娛意豁目且令都人士讀書於其中呀唔沉吟沐浴忠義之教庶以安神靈而勵士氣也夫

建忠愍祠記

錄節

本朝李如璐

知府

嗚呼忠愍公之爲千古偉人也夫人而知之夫亦何待余言第思余與公里相距才三十弱冠拜公祠卽感慨泣下不自止迨余郊居中藥毒吐聲震野已危矣因撫公書大呼曰公兩對錦衣都是胆余豈無胆乎病亦尋愈因知公之忠公之氣爲之也

狄道州志

卷五

祠祀

十五

及余改兵部拜公祠於武選司同人告曰君固公鄉人也官異署而再會於此其有夙緣乎而不知其夙緣仍在臨洮也余捧檄時卽神往所謂超然書院者至則見其道貌森嚴如在公里時而其北爲道統祠則又公之僅建見所未見也低徊久之自思超然之臺不便時往不如再建公祠於城內庶親炙有藉而焄蒿悽愴若或見之也因詳上官相度地勢鳩工於衛之廢署官民踴躍不匝月而廟成正殿三楹儀門一間維以土垣又還府署之侵地以益之而規模宏敞矣因落成而爲之記

雙忠祠記

錄節

本朝姜圖南

御史

雙忠者祀明大中丞鄒公應龍廬江太守張公萬紀也憶明世

宗自藩入繼大禮議起杖竄殆數百人不數十年士氣頹落奸邪雜出在位奄奄如抱葉寒蟬無敢復出聲者二公抗疏直陳一杖一戍而所爲奸邪以稍稍削去由今思之世宗得稱爲中興神穆得延爲至治皆二公一擊之力也張公之救忠愍也曰如以臣爲黨護將臣處死萬不足惜鄒公之叅分宜也曰如臣言不實願斬臣首懸之藁竿以謝世蕃父子當此時豈意得全首領爲完人哉撫軍六詔出守廬江猶是天王明聖不忍以未死之身苟且耳故卽以雙忠祠次忠愍之右

忠諫祠記

明王旋巡撫

此忠諫張大夫祠也大夫立肅皇帝朝慷慨批鱗與鄒中丞公

狄道州志

卷五

祠記

十六

皆彈劾分宜而罹禍者不佞自諸生時卽知其人爲直臣而心竊嚮之比不佞入撫秦關則又竊幸公皆關中人當借以奏揚

當宁昭其節也無何始入關而鄒公捐館舍不佞爲請塋祭復秩矣隨問張大夫具薦草而大夫又以訃聞矣嗟嗟大夫忠節昭映於千古事業未竟於明時君子不能無遺憾焉其時曾以忠諫額其閭而其子承第不遠千里走中州抵不佞曰先大夫自成進士歷行人兩知諫院忠鯁廉隅宦篋蕭然享不稱也雖奉特旨復秩晉階薦疏九上竟未起用位不稱也辱臺下知己勞獎優恤前後推賜俸金誼至厚也承第不敢輕自費叔立祠宇以延香火榮台下賜追先大夫未竟之享也願祠有記勞獎

者惟公則記祠者亦惟公承第敢以請不佞唯因有問於承第曰子之爲大夫祠也制若何曰堂五楹翼以通廊中構講堂及左右祭所各五楹門以外卽台下所賜忠諫坊也祠有供乎曰城以東田五十畝城西園一處歲時耕植足供樽俎也垂有訓乎曰擇後嗣之衣冠而賢者董其事子孫不能鬻亦不得私自侵奪也嗟夫有是哉子之爲而大夫祠也善矣夫世之宦而歸者其子孫陂池圃園竹木裘馬等素封自奉而已安所計於先人哉惟大夫生而忠於國故死而其子承第孝於家仁者有後信然哉且不佞嘗聞大夫之論尹守也適嚴黨橫熾之秋凡炙手染指之輩鮮不望風蠅附以資緣交權於其側乃大夫獨力

持讜論務翦其羽而奪之魄以先博浪之擊爲百司倡彼其時大夫且不知有官也而何有於後之祠當肅皇帝之醮西城也大夫執不往舉朝紳皆爲大夫危大夫獨挺然至於聖怒杖闕下臀肉盡落可與強項牽裾比彼其時大夫且不知有身也而何有於後之祠幸而聖天子仁明嘉其忠賚以金幣隨又草疏救楊忠愍觸分宜而廬州命下甫入廬越五月辨石抵官銀之屢鞫誣罪兵馬之寃衣帶圖書之外蕭然一無所有其操履清潔可與三畏四知者頡彼其時大夫且不知有家也而何有於後之祠旣歸而孝親教子與其門人孫楊馮岳輩相與講性命道德之學著爲講學語錄行於世卽省臺章疏迭奏而宏意林

泉彼其時且無復大烹之思也而何有於後之祠乃今數十年之後國之人思之祀於鄉賢家之人思之祀於別祠其視世之權奸而泯泯者不逕庭哉後有奸人媚子過其祠而歛衽曰此張忠諫祠也可捫舌汗顏退也後有忠臣義士過其祠而仰止曰此張忠諫祠也儼然有生氣在也則是祠之建也豈惟以光前佐太史之採垂不朽且以作直臣之氣衛我王家多矣不佞於承第之請而有慨於中也爲之記大夫諱萬紀字舜卿兌谿其別號也

寺觀

圓通寺 在州治東北唐尉遲敬德監修明永樂年重建設僧

狄道州志

卷五

寺觀

十八

綱司今仍之

報恩寺 在州治南

普覺寺 在州治東南

廣福寺 在州治東北明宣德年建

寶塔寺 在州治東北明永樂年建大殿有椒山公手書一聯

圓覺寺 在州治東北明宣德年建

隆禧寺 在州治東北明宣德年建

安積寺 在州治西

廣通寺 在州治西南

乾清寺 在州城西北隅

法輪寺

東巖寺 在州東一里

龍泉寺 在州東二里

西巖寺 在州西二里宋熙甯中建明萬歷時郡守岳維華重

修今洮人添建樓閣頗稱勝覽

下馬寺 在西巖寺上俗名蝦蟆寺

福興寺 在州城北二里俗名小寺子

湯房寺 在州東二十里

佛溝寺 在州東南十里內有棲霞閣

石家寺 在州南十五里

狄道州志

卷五

寺觀

十九

臥龍寺 在州西二十里

唐泉寺 在州南二十里知縣婁玠撰碑

亥母寺 在州西三十里夏牟山

正覺寺 在州北六十里知縣婁玠撰碑

石崖寺 在州南九十里

普濟寺 在州東北九十里明肅藩建

翠微寺 在州北九十里明肅藩建

法雲寺 在州南一百里俗名巴結寺

蜂窩寺 在州南五十里

西蜂窩寺 在州西南七十里

靈石寺 在州北一百二十里大石當溪玲瓏多竅故名知縣
婁玠碑記

東華庵 在州東門內

白衣庵 在州東南

西庵 在州西門內

北庵 在州北街沈家巷

慈蔭庵 在州治南三橋街

公輸庵 在州北門內街西

石覺庵 在州西五十里

萬壽觀 在州治南內有洮涓仁壽坊

狄道州志

卷五

寺觀

二十

北極觀 在州治南內有唐哥舒翰紀功碑僅丙戌哥舒四字

可辨府志作李晟立碑而翰作書者悞

九華觀 在州治北金大定時建

總真觀

太平觀 在州東北二里魏晉時建

五瘟殿 在州治東南

祖師殿 在州北關內

斗母宮 在州治東南

太平閣碑記

明雍 焯郡人

予夙居九華觀東觀有虛皇閣閣後有老君像負墻庇檐于然

僅存聞長老云古太平觀所遺也既見舊志觀在東山建自魏晉間考晉史魏咸熙中隴西見大人長三丈餘髮白著黃巾黃單衣拄杖呼王始語曰今當太平宋永嘉道士謝懷英纂老君實錄具載立觀所由與此同明初山麓存一室供像其中室廢像昇觀中意郡人權厝也迨予壯而仕丁艱以制居家時始念奉安擬尋舊山有懷未遂又從宦十餘年請告歸則遺像入閣矣壁繪天帝而像屹其前間一瞻拜戚弗甯於衷焉爰圖宿志復逡巡冗私至歲己未春乃獲經始往憶舊山之左原官構書院遂視右原之隅當西北陲昔有佛閣圯焉歲久其地半入予半屬隣居馬氏因購其半並予所有者崇之層屋以明年仲春

狄道州志

卷五

寺觀

二十一

遷奉遺像已而延僧慧月以主之迄辛酉夏竟焉山形龜首閣居震巽間轟然百尺原上遠近望之益一奇觀矣閣下祠立元武文昌法師三大神右側三官堂僑人張子興建左星君堂社士周蔣輩爲之門樓馬應楨施豎榜襲舊題本厥初爾改建重閣因邱陵爾惟時府主彭公諱榮暨縣令胡君諱鼎文胥荷津貺閣成予居什之三四他實資藉於郡中賢者始事自予而訖功則慧月力贊則田周二耆任多焉追憶私悰積二十年而始就越三載乃得述以記之又閱歲甫克登碣若或不易易然也顧遡晉逮今千餘歲而有像巋如不少隕剝抑亦漫無攸俟也與哉田君亟欲是記而予以討據未卽茲特概始末載鑄歲月

諸姓名附勒碣餘嘉靖四十一年壬戌秋八月上旬之吉

宿高石崖寺記

錄節

國朝 婁 玠

寺在高山之南溪盡峰廻若隱若現蒼烟翠靄中禽鳥喧呼牛羊上下路迂而狹騶不可並轡北轉而上其途益惡非石骨作垠卽樹根爭險里許東折架木補石爲徑甚仄緣徑而升止於僧舍旣而出僧舍轉西麓一徑蜿蜒側足而登石壁如劃峭然百餘丈壁之半有朱櫺丹戶隱露林際堂皇壯麗結構於石罅間亦人力之巧也約半里俛首入石門東向而進幽邃空洞如經斧鑿簷牙之外石覆而出雨雪不能及規模宏濶宛如天成俯欄視下百仞乃知此間去僧舍已高出幾千尋矣環顧羣山狹道州志

卷五

寺觀

二十二

拱合林木蔽空笑語足音山谷互答廻思東南名勝其得如斯者無幾也繞廊步閣遊覽未周僧又導之東去亦出小石隙沿壁削石爲級歛足循行不數百步而至東嶺嶺際萬松振響冥烟瀾漫予趑趄不能去俄焉而虎嘯猿啼與松聲雜沓慄乎其不可留也遂由東麓盤旋而下復至僧舍童子張燈治榻予時踞床趺坐良久乃寢

同門生五十人游臥龍山寺

明 楊繼盛

出門已覺精神爽况復陽回宇宙清野樹含烟迷寺迴晴山坡雪倚雲明

萬壽觀

余

璞 戶部郎中

蓬萊宮中刀圭客昔年謫下來天闕天風吹落步虛聲宮袍猶帶烟霞色背雲只寫白雲篇碧桃露和立霜研分明字字寫無誤不遇知人弗肯傳青牛又駕函關外舊日大羅知己在相携還約上蓬萊玉皇前席虛相待

龍泉寺

國朝朱受祐知府

龍山蒼翠與雲齊細草新青襯馬蹄徐步嶺頭尋鄭谷閑來水口問曹溪琳宮寂靜無人到粉壁淋漓有客題幾度催歸鐘暮發逢僧竹院話幽栖

前題

張逢王

春山一望草萋萋偶到龍泉駐馬蹄泉湧碧波流皓月龍飛霖

狄道州志

卷五

寺觀

二十三

雨潤花溪終軍有志纓堪請司馬能文柱必題豈爲偷閑尋勝地由來冰骨愛雲栖

石崖寺

婁玠

繞盡奔流踏淺汀峰回寺露萬松青馬隨細路穿林入鳥避喧聲隔澗停今夜上方應待月暫時趺坐與談經好山不費支公鈔願假禪堂看畫屏

宿新店正覺寺

沈青崖副使

河壩新樹剎客到愛登樓傍巘渠形曲遮汀柳色稠農桑正可講鼙鼓幸方休一夕停車地猶爲適野謀

元覺寺樓見沈寓舟觀察題壁作此奉寄

郭朝祚副使

休文曾此閒登眺我亦無心上寺樓素壁題詩渾似昨憑欄閒
憶幾經秋山連積石蒼蒼色水接臨洮滾滾流自古才人多不
偶思君六載滯蘭州

答郭恬菴廉使見和元覺寺題壁韻

沈青崖

西傾山下跳珠水蘭若停車獨倚樓門對古垣依落日窓含匹
練迥橫秋閒吟迴憶非佳興屬和何期有勝流過客不須思往
蹟王韶曾此定熙州

雲界寺 卽亥母寺

吳 鎮 邵人 學正

洮郡西山西上有雲界寺夢想已十年今春乃一至崖陰素花
繁洞口紅藥蒔石徑一髮懸湍沙苦崩壁飛樓插空虛金碧繞
狄道州志 寺觀 卷五 二十四

法雲寺

吳 鎮

古寺南山下吾來訪嬾殘大鵬當路立猛虎倚樓看梵語青松
響人烟白雪寒老僧眞愛客雜黍共盤桓

西岩寺憑眺

胡 俊 北地人

縹緲西岩寺登臨興自豪千山雲界隴萬壑水歸洮塞近防應
密民涓力倍勞寄言司牧者文雅在風騷

隆禧寺

高元龍 博陵人

山林永日靜無譁惟有風旛動晚霞鸚鵡聲中清梵寂琉璃光

外瑞烟斜雲穿傑閣垂銀練雪壓長松點玉花半偈心持無罣礙萬緣空處是禪家

西岩寺

高元龍

凭高把酒望超然絕景分明在眼前列障麓山通隴右如雷洮水注蘭泉樓臺影落魚龍國鐘磬聲搖日月天更喜陰濃堤上柳夕陽拖出萬家烟

北極觀古碑歌

秦濟狄道合

北極觀中有古碑碑首蜿蜒盤蛟螭跌列人形存疑似峭削真同鬼斧劖兵火屢經迷歲月石痕剝落多殘缺掃却苔蘚仔細看尙餘幾字歎奇絕鐵畫銀鈎迥通神古瘦離離似八分漢代

狄道州志

卷五

寺觀

二十五

蔡邕唐共和未知作者屬何人傳聞作碑乃李晟平定西羌稱天生或言哥舒窺牧馬此石擬等燕然銘噫嘻此語豈誠然徘徊不去更留連上下拂拭光零亂老樹盤曲生雲烟君不見嶧山突兀石一片李斯小篆世稱善又不見曹娥江畔斷碣存伯嗜摩挲贊黃絹予觀此石古難同嵯峨高聳傲崆峒安得移之荒署裏朝夕相對慰孤衷

題北極觀哥舒古碑後

吳鎮邠人

李唐重防秋哥舒控隴右浩氣扶西傾英名壯北斗帶刀夜夜行牧馬潛遁走至今西陲人歌咏遍童叟漁陽烽火來關門竟不守惜哉百戰雄權相坐掣肘平生視祿山不值一雞狗伏地

呼聖人茲顏一何厚毋乃賊妄傳借以威其醜不然效李陵屈
身為圖後英雄多苦心天道邁陽九終焉死偃師撫膺心當剖
轟轟大道碑湛湛邊城酒長劍倚崆峒永與乾坤久

春日登西岩寺

苟繪齡

紀千
庠生

老上層樓意惘然

子今年
八十矣

留詩聊結野僧緣西傾夜泮珠璣水

南浦春開錦繡天隔岸龍宮藏綠樹

沙堤東有
河神祠

傍山漁舍出青

烟芒鞋藜杖歸來晚沉醉東風又一年

棲霞閣

潘海虞先
生讀書處

黃命選

佐卿
郡人

棲霞閣上起寒霞石徑風迴聚落花一自讀書人去後山房并
載白雲遮

